

七十二家集

溫侍讀集引

溫子昇起家廣陽王客在馬
坊教諸奴子耳一旦登壇當
之者靡旗亂轍徐黃門答廣
陽表啟獨沉思曰彼有溫郎
中才藻可畏今所為廣陽起

草猶有傳者斐然可念也他
如閭闔赦詔及天平答齊神
武勅千載動人而寺碑多非
完製庾子山所推挹寒陵片
石差堪共語今其略節存焉
余嘗位置子昇才藻儘堪與

梁氏諸賢分道揚鑣濟陰遵
彥固應內遜若所云梁帝嘆
曹陸復生自恨詞人數窮百
六此北人自張大其事吾未
敢據以為信也吐谷渾元不
稱解事之國乃其國主能致

子昇數卷于牀頭此國主故
倍勝龜茲矣

天啓甲子秋日龍溪張爕書
于錢塘舟中

溫侍讀集目錄

卷之一

樂府

白鼻騮

結襪子

安定侯曲

燉煌樂

涼州樂歌二首

擣衣

詩

從駕幸金墉城

春日臨池

詠花蝶

相國清河王挽歌

詔

爲魏莊帝闔闔門赦詔

爲莊帝生皇太子赦詔

爲魏帝遷都拜廟鄴官赦詔

勅

天平元年被命作答齊神武勅

表

魏帝納后群臣上禮文表

西河王謝太尉表

爲司徒高敖曹謝表

爲臨淮王謝封開府尚書令表

爲南陽王讓尚書表

爲上黨王穆讓太宰表

清江雜錄
目錄
爲廣陵王讓吏部尚書表

爲安豐王延明讓國子祭酒表

爲廣陽王壯征請大將表

卷之二

上書

爲廣陽王淵上書

爲廣陽王淵上書靈太后

銘

鐘銘

碑

舜廟碑

寒陵山寺碑

大覺寺碑

印山寺碑

定國寺碑

常山公主碑

墓誌銘

司徒元樹墓誌銘

司徒祖塋墓誌

文

閭闔門上梁祝文

附錄

溫子昇傳

北齊魏收

遺事

集評

溫侍讀集卷之一

魏濟陰溫子昇鵬舉著

明閩漳張 熒紹和纂

樂府

白鼻騮

少年多好事攬轡向西都
相逢狹斜路駐馬詣
當壚

結襪子

誰能訪故劍會自逐前魚
裁統終委篋織素空

有餘

安定侯曲

封疆在上地鐘鼓自相和美人當窓舞妖姬掩
扇歌

燉煌樂

客從遠方來相隨歌且笑自有燉煌樂不減安
陵調

涼州樂歌二首

遠遊武威郡遙望姑臧城車馬相交錯歌吹日

縱橫

路出玉門關城接龍城坂但事絃歌樂誰道山川遠

擣衣

長安城中秋夜長佳人錦石擣流黃香杵紋砧知近遠傳聲遞響何淒涼七夕長河爛中秋明月光
蟬塞邊絕候鴈鴛鴦樓上望天狼

詩

從駕幸金墉城

茲城實佳麗飛甍自相並膠葛擁行風岩巖闕
流景御溝屬清洛馳道通丹屏湛淡水成文參
差樹交影長門久已閉離宮一何靜細草緣玉
階高枝蔭桐井微微夕渚暗肅肅暮風冷神行
揚翠旗天臨肅清警伊臣從下列逢恩信多幸
康衢雖已泰弱力將安騁

春日臨池

光風動春樹丹霞起暮陰
差我映連壁飄飄下
散金徒自臨濠渚空復撫鳴琴
莫知流水曲誰
辨遊魚心

詠花蝶

素蝶向林飛紅花逐風散
花蝶俱不息紅素還
相亂芬芬共襲手歲蕤從可玩
不慰行客心遽
動離居歎

相國清河王挽歌

高門詎改轍曲沼尚餘波
何言吹樓下翻成薤

露歌

溫侍讀集

卷之一

四

詔

爲魏莊帝闔闔門赦詔

蓋天道忌盈人倫嫉惡疎而不漏刑之無捨是以呂霍之門禍譴所伏梁董之家咎徵斯在頃孝昌之末天步孔艱女主亂政監國無主爾朱榮爰自晉陽同憂王室義旗之建大會盟津與世樂推共成鴻業論其始圖非無勞效但致遠恐泥終之實難曾未崇朝豺聲已露河陰之役安忍無親王公卿士一朝塗地宗戚靡遺內外

俱盡假弄天威殆危神器時事倉卒未遑問罪
尋以葛賊橫行馬首南向捨過責成用平醜虜
及元顥問鼎大駕北巡復致勤王展力行所以
此論功且可補過旣位極宰衡地踰齊魯容養
之至豈復是過但心如猛火山林無以供其暴
意等漏卮江河無以充其溢旣見金華稍寧方
隅漸泰不推天功專爲己力與奪任情臧否肆
意無君之跡日月以甚拔髮數罪蓋不足稱斬
竹書愆豈云能盡方復託名朝宗陰圖纂逆脾

睨天居窺覲聖曆乃有裂冠毀冕之心將焉救
本塞源之事天旣厭亂人亦悔禍同惡之臣密
來投告將而必誅罪無容捨又元天穆宗室未
屬名望素微遭逢際會頗參義舉不能竭其忠
誠以奉家國乃復棄本逐末背同卽異爲之謀
主成彼禍心是而可忍孰不可恕並以伏辜自
貽伊戚元惡旣除人神慶泰便可大赦天下

爲莊帝生皇太子赦詔

有國三善事屬元良本枝百世義鍾繼體朕應
天纂命握圖受籙景祚維新十年以永今月吉
辰皇子誕育彩雲映日神光照殿方開博望將
起龍樓遠近同歡人神共悅便可大赦天下

爲魏帝遷都拜廟鄴宮赦詔

建國所先理屬於宗廟立事爲大禮歸於禋祀
大丞相渤海王神武命世重匡頽曆導塞源於
將竭扶神器於已傾立天地之大功成人臣之
重義朕以冲昧猥當樂推關路多虞衿帶難固
瞻言往事取則前修乃襲去鄴用追遷亳定鼎
鄴都卜世惟永民用子來功成不日今清廟初
興闕官始就靈祇萃止祖考來格神光夜照香
氣朝聞今月吉辰躬展誠敬時和氣婉景麗雲

柔四表來庭萬國在位哀樂相交感慶兼集固
宜觀象雷雨布寬大之恩取類澤風申肆肯之
令可大赦天下

勅

天平元年被命作答齊神武勅

高歡擁立魏孝武於洛陽自歸鄴都已斛
斯椿構帝漸與歡隙封隆之孫騰亡奔歡
洩其謀帝規欲討歡假稱將伐句吳且借
宇文賀拔歡亦表稱勒兵四道伏聽處分
仍申信誓云爲嬖倖所聞一旦賜疑若負
陛下身受天殃子孫殄絕一二佞臣願斟
量廢出帝命舍人溫子昇草勅答之子昇
遠巡未敢作帝據胡床拔劍作色乃遣筆
前持心血遠以示王深冀彼此共相體悉而不
良之徒坐生間貳近孫騰倉卒向彼致使間者
疑有異謀故遣御史中尉綦儁且申朕懷今得

王啓言誓懇惻反覆思之猶所未解以朕眇身
遇王武畧不勞尺刃坐爲天子所謂生我者父
母貴我者高王今若無事背王規相攻討則使
身及子孫還如王誓皇天后土實聞此言近慮
宇文爲亂賀拔勝應之故纂嚴欲與王俱爲聲
援宇文今日使者相望觀其所爲更無異迹賀
拔在南開拓邊境爲國立功念無可責君若欲
分謗何以爲辭東南不賓爲日已久先朝以來
置之度外今天下戶口減半未宜窮兵極武朕

既闇昧不知佞人是誰可列其姓名令朕知也
如聞庫狄干語王云本欲取懦弱者爲主王無
事立此長君使其不可駕御今但作十五日行
自可廢之更立餘者如此議論自是王間勲人
豈出佞臣之口去歲封隆之背叛今年孫騰之
逃走不罪不送誰不怪王騰旣爲禍始曾無愧
懼王若事君盡誠何不斬送二首王雖啓圖西
去而四道俱進或欲南渡洛陽或欲東臨江左
言之者猶應自怪聞之者寧能不疑王若守誠

不貳晏然居北在此雖有百萬之衆終無圖彼之心王脫信邪棄義舉旗南指縱無匹馬隻輪猶欲奮空拳而爭死朕本寡德王已立之百姓無知或謂實可若爲他所圖則彰朕之惡假令還爲王殺幽辱壅粉了無遺恨何者王旣以德見推以義見舉一朝背德舍義便是過有所歸本望君臣一體若合符契不圖今日分疎到此古語云越人射我笑而道之吾兄射我泣而道之朕旣親王情如兄弟所以投筆拊膺不覺歔

歛



表

魏帝納后群臣上禮文表

臣聞軒轅乃至西陵以之作合夏后至聖塗山
于是來嬪伏惟陛下龍飛纘曆大明理運長秋
既建陰教有主景命無窮靈基長世普天之下
莫不欣躍

西河王謝太尉表

臣聞拂羽決起力謝摩天策蹇載馳功微送日
將短翮難以陵高鶩乘無由致遠雖復建旗出
郡未追楚趙之風捧壺入侍徒踵金張之迹及
天祚明德運啓興王六遂始遷九門初定於焉
承乏有用當官草靡從風未遑克讓常恐執轡
傾輪操刀傷錦

爲司徒高敖曹謝表

委水橫流群龍交戰徒悲道喪空懷主辱雖復
見義援戈臨危奮劍傾慚後衄終謝先鞭事等
泣河無救三川之竭有類憂天豈支四極之壞

爲臨淮王謝封開府尚書令表

臣道愧山東氣慚隴右激水弗功搏風無力但
以平原帶地資緒極天發趾自高理翮以遠出
臨侯服旣乏刺舉之能入踐帝閭又無應對之
美空復受戈清廟推轂朱門孝闕淚河功慚汗
海大寶遠隆橫草未樹傾以有涯願言知止

爲南陽王讓尚書表

臣聞立而託乘乃成致遠之功坐以運舟遂有
利涉之用若以輕任重課憑虛責實雖欲自勤
終焉靡效

爲上黨王穆讓太宰表

臣聞策蹇長途終慚一日之致懸縷層臺詎任
千鈞之重固知才弱不可自強力微難以企及
智小謀大恐貽折足之憂才輕任重懼有絕贖
之悔旣慮鏤金固陳匪石

爲廣陵王讓吏部尚書表

假勢風雲非由羽翮徒得推遷就列僂俛當官
曾無辟雍議禮之名詎有銅雀獻賦之敏而政
本寔繁司會尤切抑揚智地用舍時流實當年
之準的乃一世之權衡得其人則分職之任隆
非其才則曠官之失起

爲安豐王延明讓國子祭酒表

臣聞寶劍未砥猶乏切玉之功美箭闕羽尚無
衝石之勢况才非會稽之竹質謝昆吾之金至
於敷教東序流訓上庠置樽候酌懸鐘待叩必
須蘊朱藍以成彩立規矩以爲式垂三行於費
游揚六藝於胄子而臣譚愧聚沙問慙攻木雖
歷文史不治章句於茲曠官青衿何仰

爲廣陽王北征請大將表

今四郊多壘三軍申發率土之濱莫敢寧晏况
忝末屬復董元戎臣不盡心誰將竭力豈容飾
讓苟違戎重但以軍旅之事實所未學求保重
將隨方指麾臣請先驅被堅督戰若使旗鼓相
望埃塵相接決機兩陣之間不辭萬死之地脫
獨委臣專總戎旅兵術靡常軍機屢變以臣當
之必所未達雖奉廟筭有均膠柱

溫侍讀集卷之二

魏濟陰溫子昇鵬舉著

明閩漳張 熒紹和纂

上書

爲廣陽王淵上書

淵爲比道大都督受尚書令李崇節度
時東道都督崔暹敗於白道淵上書

邊豎構逆以成紛梗其所由來非一朝也昔皇
始以移防爲重盛簡親賢擁麾作鎮配以高門
子弟以死防遏不但不廢仕宦至乃偏得復除

當時人物忻慕爲之及太和在歷僕射李冲當
官任事涼州土人悉免厮役豐沛舊門仍防邊
戍自非得罪當世莫肯與之爲伍征鎮驅使但
爲虞候白直一生推遷不過軍主然其徃世房
分番居京者得上品通官在鎮者便爲清途所
隔或投彼有北以御魍魎多復逃胡鄉乃峻邊
兵之格鎮人浮遊在外皆聽流兵捉之於是少
年不得從師長者不得遊宦獨爲匪人言者流
涕自定鼎伊洛邊任益輕唯底滯凡才出爲鎮

將轉相模習專事聚斂或有諸方姦吏犯罪配
邊爲之指蹤過弄官府政以賄立莫能自改咸
言姦吏爲此無不切齒憎怒及阿那瓌背恩縱
掠竊奔命師追之十五萬衆度沙漠不日而還
邊人見此援師便自意輕中國尚書令臣崇時
卽申聞求改鎮爲州將允其願抑亦先覺朝廷
未許而高闕戍主率下失和拔陵殺之爲逆命
攻城掠地所見必誅王師屢北賊黨日盛此段
之舉指望銷平其崔暹隻輪不及臣崇與臣遂

巡復路今者相與還次雲中馬首是瞻未便西
邁將士之情莫不解體今日所慮非止西北將
恐諸鎮尋亦如此天下之事何易可量

爲廣陽王淵上書靈太后

往者元乂執權移天徙日而徽託附無翼而飛
今大明反政任寄唯重以徽褊心銜臣切骨臣
以疎滯遠離京輦被其構阻無所不爲然臣昔
不在其後自此以來齟成陵谷徽遂一歲八遷
位居宰相臣乃積年淹滯有功不錄自徽執政
以來非但抑臣而已北征之勲皆被擁塞將士
告捷終無片賞雖爲表請多不蒙遂前晉元標
死于盛樂後被重圍析骸易子倒懸一隅嬰城

二載賊散之後依階乞官徽乃盤退不允所請而徐州下邳戍主賈勲法僧叛後斃被圍逼固守之勲比之未重乃立得州卽授開國天下之事其流一也功同賞異不平謂何又驃騎李崇北征之日啓募八州之人聽用關西之格及臣在後依此科賞復言北道征者不得同於關西定襄陵廟之至重平城守國之要鎮若計北而論功亦何負于秦楚但以嫉臣之故便欲望風排抑然其當途以來何直退勲而已但是隨臣

征者卽便爲所嫉統軍袁叔和曾經省訴徽初
言有理又聞北征隸臣爲統應時變色復令臣
兄子仲顙異端訟臣緝緝翩翩謀相誹謗言臣
惡者接以恩顏稱臣善者卽被嫌責甄琛曾理
臣屈乃視之若仇讐徐紇頗言臣短卽待之如
親戚又驃騎長史祖瑩昔在軍中妄增首級矯
亂戎行蠹害軍府獲罪有司避命山澤直以謗
臣之故徽乃還雪其罪臣府司馬劉敬比送降
人旣到定州灑然背叛賊如決河豈其能擁且

以臣府參寮不免身首異處徽旣怒遷捨其元惡及胥徒從臣行者莫不悚懼頃恒州之人乞臣爲刺史徽乃斐然言不可惻及降戶結謀臣頻表啓徽乃因執言此事及向定州遠彼姦惡又復論臣將有異志翻覆如此欲相陷沒致令國朝遽賜遷代賊起之由誰使然也徽旣優幸任隆一世慕勢之徒於臣何有是故餘人攝選車馬填門及臣居邊賓遊罕至臣近北爲慮其爲梗是以孜孜乞赴京闕屬流人舉斧元戎垂

翹復從後命自安無所僥倖先驅不敢辭事及
臣出都行塵未滅已聞在後復生異議言臣將
兒自隨證爲可疑之兆忽稱此以構亂悠悠之
人復傳音響言左軍臣融右軍臣衍皆受密勅
伺察臣事徽旣用心如此臣將何以自安竊以
天步未夷國艱猶梗方伯之任於斯爲急徽昔
臨藩乃有人譽及居端右蔑爾無聞今求出之
爲州使得申其利用徽若外從所長臣無內慮
之切脫蒙闕公私幸甚

銘

鐘銘

宮商遞變律呂相生立號則起從革以成調之
必應擊而不橫銅盤韻響火鳥和聲出入成則
明宵有數

碑

舜廟碑

懷山不已龍門未闢大道御世天下爲公感夢
長人明敷仄陋釐降二女結友九男執耜歷山
耕夫所以讓畔施晷雷澤漁父於是讓川亦旣
登庸以之納錄九官咸事百揆時敘有大功于
當世集歷數而在躬受文祖之命致昭華之玉
班五瑞於群后禋六宗於上玄舞千戚而遠夷
賓棄金璧而幽靈應青雲浮洛榮光塞河符瑞

必臻休祥咸萃以君人之大德爲帝王之稱首
陟方之駕遂往蒼梧之窆不歸爰自先民實存
舊廟旣緝葯房遂鎮瑤席龍駕帝服蓋依稀于
慕舜交鼓絙瑟實髣髴于聞韶其辭曰

虹氣降靈姚墟誕聖樹陰未隳帝圖已定乃賓
四門以齊七政天眷功高民歸德盛治旣蕩蕩
化亦巍巍南風在詠西環有歸疑山永逝湘水
長遶靈宮蕭蕭神館微微

寒陵山寺碑

昔晉文尊周續宣於踐土齊桓霸世威著於邵陵並道冠諸侯勲高天下衣裳會同之所兵車交令之處寂寞消沈荒涼磨滅言談者空知其名遙遇者不識其地然則樹銅表跡刊石記功有道存焉可不尚與永安之季數鍾百六天災流行人倫交喪爾朱氏旣絕彼天綱斷茲地紐祿去王室政出私門銅馬競馳金虎亂噬九嬰暴起十日並出破壁毀珪人物旣盡頭會箕歛

杼軸其空大丞相渤海王命世作宰惟機成務
標格千仞崖岸萬里運鼎阿于襟抱納山岳於
胸懷擁玄雲以上騰負青天而高引鐘鼓嘈囋
上聞於天旌旗繽紛下盤於地壯士凜以爭先
義夫憤而競起兵接刃於斯塲車錯轂於此地
韓蕢隱隱若轉石之墜高崖礧礧磕磕如激水
之投深谷俄而霧捲雲除冰離葉散靡旗蔽日
亂轍滿野楚師之敗於柏舉新兵之退自昆陽
以此方之未可同日旣考茲沃壤建此精廬砥

石礪金瑩珠琢玉經始等於佛功制作同於造化
息心是歸淨行攸處神異畢臻靈仙總萃鳴
玉鸞以來遊帶霓裳而至止翔鳳紛以相囀飛
龍蛇而俱躍雖復高天銷於猛炭大地淪於積
水同以傳之不朽終亦記此無忘

大覺寺碑

維天地開闢陰陽轉運明則有日月幽則有鬼神
初地遼遠末路悠長自始及終從凡至聖積
骨成山祇劫莫數垂衣拂石恒河難計及冠日
示夢蒙羅見謁應世降神感物開化顏如滿月
心若盈泉體道獨悟含靈自曉居三殿以長想
出四門而永慮聲色莫之留榮位不能屈道成
樹下光燭天上變化靡窮神通無及置須彌於
葦塵納世界於微塵闢慈悲之門開仁壽之路

拯煩惱於三塗濟苦難於五濁非但化及天龍
教被人鬼固亦福霑行鴈道洽遊魚但群生無
感獨尊罷應雜色照爛諸山搖動布金沙而弗
受建寶蓋而未晉遂上微妙之臺永升智慧之
殿而天人慕德象法興靈圖影西山承光東壁
主上乃據地圖攬天鏡乘六龍朝萬國牢籠宇
宙襟帶江山道濟橫流德昌頽曆四門穆穆百
僚師師乘法船以徑度駕天輪而高舉神功寶
業旣被無邊鴻名懋實方在不朽抵掌措言雖

不盡意執筆書事其能已乎

印山寺碑

自結繩運往觀象代興禮樂相因詩書間出喻
是非于一指論道德于二篇九流之義遂開百
家之言並作皆以賦命有遭隨攝養致天壽愛
惠起於吉凶情僞動於利害雖改張羅之呪未
易繫鐘之牲因果之業未申感應之途猶蔽是
以脩短有命子夏論之而未詳報施在天史遷
言之而未悟大丞相渤海王膺岳瀆之靈感辰
象之氣直置與蘭桂齊芳自然共珪璋比潔加

法體備百行智周萬象道兼語嘿思極天人固
以兆云非虎自懷公輔之德世稱臥龍實任王
佐之器道足以濟天下行足以通神明表立人
之上才含廣途之大量永安之末時多異謀蜂
蠆有毒豺狼反噬殼弩臨城抽戈犯蹕世道交
喪海水群飛旣而蒼龍入隱白虎出見命世有
期匡時作宰拯沉溺以援手涉波瀾而濡足懸
鰲目於胸懷起大風於襟袖動之以仁義行之
以忠貞附之者影從應之者響起

定國寺碑

蓋兩儀交運萬物並生始自苦空終於常樂而緣障未開業塵猶擁漂淪欲海顛墜邪山雖復光華並於日月術數窮於天地有扶危定傾之力爲濟世夷難之功登途山而未歸遊建水而不反並馳於苦樂之境皆入於生死之門幽隱長夜未覩山北之燭沈迷達路詎見司南之機昔日先民雖云善誘尚習蓋纏未能解脫至如八卦成象示之以吉凶百藥爲醫道之以利害

衣食有業民免饑寒之憂水土旣平人無墊溺
之患斯誠事周於世用功濟於生民不論過去
之因緣詎辨未來之果報惟無上大覺均悟玄
機應現託生方便開教聖靈之至無復等級威
神之力不可思議動三乘之駕汎八解之流引
諸子於火宅渡群生於海岸自一音輟響雙樹
潛神智慧雖徂象法猶在光照金盤言留石室
徧諸世界咸用歸仰

常山公主碑

啓泰微之層構闢閭闔之重扉擬天下以爲家
苞率土而光宅然則昆山西峙爰有夜光漢水
東流是生明月公主稟靈宸極資和天地芬芳
有性溫潤成質自然秘遠若上元之隔絳河直
置清高類姮娥之依桂樹令淑之至比光明於
宵燭幽閒之盛匹穠華於桃李託體宮闈而執
心撫順婉然左辟率禮如賓舉華燭以宵征動
鳴佩而晨去致肅雍於車乘成好合於琴瑟立

行縈於清冰抗志高於黃鵠停輪表信闔門示
禮終能成其子姓貽厥孫謀而鐘漏相催日夜
不息川有急流風無靜樹奄辭身世從宓妃於
伊洛遽捐館舍追帝子於瀟湘銘曰

龍轡莫援日車遂往奄離形神忽歸丘壤祖歌
雝露出奏巫山永曆中野終掩窮泉蕭瑟神道
荒涼墓田松檟徒列琬琰空傳

墓誌銘

司徒元樹墓誌銘

昔樞電降祥姬水成業握八符以馭世膺五命
以會昌欽明格於上下光澤被於宇宙卜年永
久歷世遐長有文王之孫子啓周公之苗裔積
善所及踵武稱賢每以辛李爲言恒持端白自
許殫百慮之一致盡能事於生民蒼蒼在上義
歸無厚徒有東平避世之意空懷北海自晦之
情疾非逢霧終異啓手銘曰

明允篤誠發於岐嶷未鏤已雕不扶而直脩禮
以耕強學爲殫孔旣歎魯莊亦吟越况以度思
有懷明發翻然高舉歸於魏闕長路未窮朝光
已沒

司徒祖塋墓誌

自天命生商王居徙亳源源誌遠枝葉繁華祖
德潤於身聲高邦國父行成於已名重京師公
鍾美多福資神積善器局閑靈志識開悟口含
碧雞之辨手握雕龍之文門有善業家傳慶靈
礪金成器相遺滿籬琢玉爲寶待價聯城匪直
也人實惟有道言析秋毫辭連春藻

文

閭闔門上梁祝文

維王建國配彼太微大君有命高門啓扉良辰
是簡穆卜無違雕梁乃架綺翼斯飛八龍杳杳
九重巍巍居宸納祐就日垂衣一人有慶四海
攸歸

附錄

溫子昇傳

北齊魏收

溫子昇字鵬舉自云太原人晉大將軍嶠之後也世居江左祖恭之劉義隆彭城王義康戶曹避難歸國家于濟陰宛句因爲其郡縣人焉家世寒素父暉袁州左將軍府長史行濟陰郡事子昇初受學于崔靈恩劉蘭精勤以夜繼晝晝夜不倦長乃博覽百家文章清婉爲廣陽王淵賤客在馬坊教諸奴子書作侯山祠堂碑文常

景見而善之故請淵謝之景曰頃見溫生淵怪問之景曰溫生是大才士淵由是稍知之熙平初中尉東平王匡傳召辭人以充御史同時射策者八百餘人子昇與盧仲宣孫舉等二十四人爲高第於時預選者爭相引決匡使子昇當之皆受屈而去舉謂人曰朝來靡旗亂轍者皆子昇逐北遂補御史時年二十二臺中文筆皆子昇爲之以憂去任服闋還爲朝請後李神儻行荊州事引兼錄事參軍被徵赴省神儻表晉

不遣吏部郎中李獎退表不許曰昔伯瑜之不
應晉王朗所以發嘆宜速遣赴無踵彥雲前失
於是還員正光末廣陽王淵爲東北道行臺召
爲郎中軍國文翰皆出其手於是才名轉盛黃
門郎徐紇受四方表啓客之敏速於淵獨沉思
曰彼有溫郎中才藻可畏高車破走珍寶盈滿
子昇取絹四十疋及淵爲葛榮所害子昇亦見
羈執榮下都督和洛興與子昇舊識以數十騎
潛送子昇得達冀州還京李楷執其手曰卿今

得免足使夷甫慙德自是無復宦情閉門讀書
厲精不已建義初爲南主客郎中修起居注魯
一日不直上黨王天穆時錄尚書事將加捶撻
子昇遂逃遁天穆甚怒奏人代之莊帝曰當世
才子不過數人豈容爲此便相放黜乃寢其奏
及天穆將討邢杲召子昇同行子昇未敢應天
穆謂人曰吾欲收其才用豈懷前忿也今復不
來便須南走越北走胡耳子昇不得已而見之
加伏波將軍爲行臺郎中天穆深加賞之元顥

入洛天穆召子昇問曰卽欲向京師爲隨我北
渡對曰主上以虎牢失守致此狼狽元顥新入
人情未安今徃討之必有征無戰王若克復京
師奉迎大駕桓文之舉也捨此北渡竊爲太王
惜之天穆善之而不能用遣子昇還洛顥以爲
中書舍人莊帝還宮爲顯任使者多被廢黜而
子昇復爲舍人天穆每謂子昇曰恨不用卿前
計除正員郎仍舍人及帝殺爾朱榮也子昇預
謀當時赦詔子昇詞也榮入內遇子昇把詔書

問是何詔書子昇顏色不變曰勅榮不視之爾
朱兆入洛子昇懼禍逃匿永熙中爲侍讀兼舍
人鎮南將軍金紫光祿大夫遷散騎常侍中軍
大將軍後領本州大中正蕭衍使張臯寫子昇
文筆傳於江外衍稱之曰曹植陸機復生於此
士恨我辭人數窮百六陽夏太守傅標使吐谷
渾見其國主牀頭有書數卷乃是子昇文也濟
陰王暉業嘗云江左文人宋有顏延之謝靈運
梁有沈約任昉我子昇足以陵顏轢謝含任吐

沈務遵彥作文德論以爲古今辭人皆負才遺
行澆薄險忌唯邢子才王元景溫子昇彬彬有
德素齊文襄王引子昇爲大將軍府諮議參軍
子昇前爲中書郎嘗許蕭衍客館受國書自以
不修容止謂人曰詩章易作連峭難爲文襄館
客元僅曰諸人當賀推子昇合陳辭子昇久怩
幌乃推陸操焉及元僅劉思逸荀濟等作亂文
襄疑子昇知其謀方使之作獻武王碑文旣成
乃餓諸晉陽獄食敝襦而死棄尸路隅沒其家

口太尉長史宋遊道收葬之又爲集其文筆爲
三十玉卷子昇外恬靜與物無競言有準的不
妄毀譽而內深險事故之際好顏其間所以終
致禍敗又撰永安記三卷

遺事

爾朱榮圍朝士於堤東臨以白刃云能爲禪文
者出當原其命李神儁李諧溫子昇並當世辭
人皆在圍中耻是從命俯伏不應

肅帝召溫子昇告以殺爾朱榮狀并問殺董卓
事子昇具通本上曰王允若卽赦涼州人必不
應此

李廷寔除青州刺史帝曰懷博之俗世號難治
舅宜用心時楊寬在帝側不曉懷博之義私問

溫子昇子昇曰彭城王爲青州聞齊土之民太
守初入境皆懷博叩頭及其代還以博擊之懷

博之義起于此也

伽藍記

集評

樂安孫彥舉濟陰溫子昇並自孤寒鬱然特起
咸能綜採繁縟與屬清華比於建安之徐陳應
劉元康之潘張左束各一時也

北史文苑傳序

庾信至北唯愛溫子昇寒山寺碑後還南人問
北方何如信曰唯寒山寺一片石堪共語餘若
驢鳴犬吠耳

新語補

北人謂溫子昇凌顏鑠謝朓沈吐任雖誇詡語
然子昇文筆艷發自當爲彼中第一人生江左

溫侍讀集

附錄

敵不在四君下

詩數

六